

Vågå Historielag: Årsmelding 2024

Arrangement

Historielaget har i samarbeid med Gudbrandsdalsmusea hatt fleire foredrag / kveldsseto i Jutulheimen. Ole Kristian Ødegård fortalde om engelskmannen Wyndhams reise i Norge. Kirsten Visdal og Bjørg Schultz hadde tema om lin i tilknytning til utstillinga i Ullinsvin, og Jakup Skjedsvoll tok for seg at landslova er 750 år. Gudbrandsdal slektshistorielag hadde tema om slektsgransking, og på årsmøtet var det om «gard og slekt» i enkelte grender. Ei kveldsseto var om kunstnarane Jo Visdal og William Duppa Crotch, vi fekk da sett desse utstillingane i Jutulheimen. Steinar Moldal fortalde om den gamle Finnbrua og om tre og materialkunnskap. Siste kveldsseto før jul var om heimebrenning med bl.a. Ola Stokstad. I august var vi i Sælatunga og fekk omvising av Rønnaug Stjernvang, og i september var det omvising på Sagflaten av Kjell Voldheim.

Jutulheimen

Det er Gudbrandsdalsmusea AS som står for drifta av Jutulheimen. Vågå Historielag er aksjeeigar i Gudbrandsdalsmusea AS og er aktivt med i planleggjing og drøfting av vedlikehald, drift og utstillingar. Med støtte frå Vågå kommune har toalettavdelinga vorte utskifta og oppgradert til handikapstandard. Mykje av dette samt anna stell og brøyting er utført på dugnad.

Prestgarden

Det er i året drenert rundt paktarhuset og lagt golv under låvebrua. Ved fjøset er utstillingsmonter til «jernhesten» under byggjing. Kommunen er hovudaksjonær i aksjeselskapet Galleri Ullinsvin AS, historielaget og husflidslaget har mindre eigardelar. Galleri Ullinsvin AS har stått for galleridrift i utstillingsbygget, låven og stabburet, og brukt paktarhuset til kafe. Paktarhuset er også brukt av kameraklubben. Gudbrandsdalsmusea hadde utstillingar i fjøset, på trevet, i aurbua og på toppen av låven. Husflidslaget brukar hovudbygningen og fyrste etasjen i studeren og har stor aktivitet. Andre etasje i studeren var brukt til kunstnarverkstad for barn. Ullinsvin hadde svært mange besøkjande dette året. Samarbeidsutvalet for Ullinsvin der alle aktørane er med, arrangerte julemesse med utstillingar og aktivitetar med godt besøk. Samarbeidsutvalet arrangerte også fest for dugnadsgjengen og har elles stått for servering ved fleire arrangement. Restaurering av fyrste etasjen av hovudbygningen med bl.a. nytt kjøkken er i gang.

Prestgardshågein

Hagegruppa i historielaget er organisert slik at ansvar for stell, lusing, vatning mm. er fordelt for kvar veke. Hagen har fungert godt som ein del av tilbodet i Ullinsvin saman med utstillingane. Kari Hølmo Holen (leiar), Magnhild Råstad og Ågot Råstad har leiinga av hagegruppa. Ei eige utomhusgruppe har stått for plenklipping samt raking og rydding både i hagen og på tunet i Ullinsvin.

Ullinsvin AS

Det heileigde selskapet Ullinsvin AS er eigar av nybygget i prestgarden. Kjellaren husar museumsmagasin og arkiv. Gudbrandsdalsmusea AS står for drifta av magasinet. Galleri Ullinsvin AS brukar utstillingsbygget. Ullinsvin AS har same styre som historielaget.

Laget elles

Frå årsmøtet 10. april 2024 har styre vore dette:

styreleiar Knut Raastad, nestleiar Dag Aasheim, styremedlemmar Rønnaug Siem Hammer, Elin Grev og Jørgen Hagen, varamedlemmar Ola Stokstad, Ågot Råstad og Mette Vårdal.

Det har i året vore 12 styremøter, og varamedlemmane møter på lik line med styremedlemmane. Laget har 430 medlemmar.

Revisorar er Astrid Sandbu og Einar Hårstad.

Valnemnd er Jakup Skjedsvoll, Eirik Haugen og Mathias Øvsteng.

Trond Ole Haug er styremedlem i Gudbrandsdalsmusea AS.

Jens Hagen er styremedlem i Galleri Ullinsvin AS.

Historielaget er medlem i Gudbrandsdal historielag Dølaringen, Knut Raastad er revisor der.

Nils Valde styrer heimesida vaagaa-historielag.org og skannar og legg ut innsamla gamle bilde, Gudbrandsdalsmusea legg ut bilde på digitaltmuseum.no. På heimesida er det ei mappe med gards- og slektshistorie. God oppslutning om frivillige medlemspengar gjer utgjeving av årsskriftet Jutulen mogleg med utsending til alle medlemmane, i tillegg er skriftet utlagt for salg. Historielaget kostar pynting av gravene til Ivar Kleiven, Trond Eklestuen og Jo Gjende.

Pulløybua er bortleigd som anneks til nabohytta. Nordheradsprosjektet disponerer Flåten.

Buene ved Gjendeosen vil kunne lånast ut til historielags-medlemmar. Styret takkar samarbeidspartar og medlemmar i laget for god hjelp og støtte i året 2024.

Toalettavdelinga i Jutulheimen er utskifta og oppgradert til handikapstandard, bl.a. med mura trapp.

